

Èrt i feghes del Sacro Cher sui crepes de Fascia

I volontàdives à empeà sù i feghes sa le Crepate, sun Sas de la Crouse e sun Sas da Ciampac



I gran Cher enlumenà sun Sas de la Crouse.



Ence Fernando Brunel deida a partèr legna.

Traditions - En domenìa ai 10 de jujn crodèa la festa del Sacro Cher e su la sera, canche fior i ultimes raes de soereie, l'è tradizion, l'è usanza veiora te dut l Tirol, de empeèr sù i feghes en recordanza de chel jurament de fidelità al Sacro Cher de Gejù.

Sacro Cher patron de dut l veie Tirol che dant de la Pruma Vera mondièla tolea ite l Tirol del Noed d'aldidanché, con sia capitala Dispruch, l Tirol del Sud d'aldidanché, con sie zenter politich amministratif de Busan, chel che enlouta era chiamà Welschtirol, con la provinzia de Trent e la valèdes ladines de Gherdena, Badia, Fascia, Fodom e Ampez. L'era enlouta i raions di Prinzipes Vescoves de Trent e Pensenon.

E apontin che col pericol del ruire te nesc raions de l'ona del chiamà "renovament" con la idèes de la revolucion franzoua e de la mires militères de Napoleon, del 1796 l popul del Tirol à domanà protezion del Sacro Cher de Gejù.

Na tradizion, chela de empeèr i feghes sui mont auc del Tirol, che è amò viva tel creer e tel cher de la jent, encor dò egn e egn de sofoament de la usanzas fones, de recordanza de chi ries mormene de chi tempes de la veres de Napoleon, di tempes de la veres de liberazion del Tirol da pèrt di Scizeres de Andreas Hofer che nience i nazionalismes del secol passà è stae bogh de destudèe.

L'è stat sot l fascism e ti egn dò che chesta usanzas te Fascia les è jites fora.



I volontàdives del Grop folk de Soraga se enjigna a dessegnar fora l gran Cher con la Crouse.

A les trèr cà ge à pissà acà i egn la Compagnia di Scizeres de Fascia e desvalives Gropes de folclor su la spenta de l'Union di Ladins.

Tempruma vegnia fat i feghes sun Sas da Mesdi e Piz Meda sunsoera Moena, da dotrei egn i vegn fat lò da le Crepate e da Roncae.

L'auter bel fech, na gran Crouse de passa 30 metres con sie gran Cher, à slumenà sun Sas de la Crouse per soemenzadiva di fene e na tousa del Folclor de Soraga.

Da chest an n auter fech l'è stat empeà sun Sas da Ciampac sun Mont de Vael.

Ence l temp à didà dò, l'è fat l valent ensin canche i feghes i era dò a se morentèr via.

La gran Crouse longia 30 metres e l Cher che ardea sui giarons de Sas

de la Crouse e chel sun Vael, da l'autra man de la val, se i vedea da Ciampedel ensin sot ju Moena, da due i pajes de Fascia.

Na tradizion che volassane slarier fora ence a outra sociazions de duta la val de empeèr sù sun vigni pisauch de noscia val, da Rodèla a Col Bel, da Bulfaure su la crestes de Duron e sul Ponjin.

Viventèr e tegnr sù na tradizion che nesc giaves, nesc antenac, metea en esser ensin al temp de la Pruma Vera mondièla. Chest spirit vel portèr inant ence te la neva generazions na recordanza dovevosa, la devozion al Sacro Cher de Gejù, sorastant del Land Tirol.

Fernando Brunel, president de l'Union di Ladins de Fascia



Sun Vael i volontères e i Scizeres de Fascia tedont al gran fech con la bandieres.



Ence chest an l'è stat empeà sù i feghes sa le Crepate sora Moena.